

16 października 2017 r.

Kajsik ‘ech wyczytół (abo usłyszół) taki szpasowny kōnsek, kery Wōm rzykna po mojemu. To bół brif mamulki do swojigo synka. Dejcie pozōr!

Pisza do Cia tych pōra szkryfkōw, cobyś wiedziół, iże ku Cia pisza. Kej ty tyn brif dostaniesz, to bydzie znaczoło, iże łōn do Cia doszół. Jak go niy dostaniesz, dej mi znać, to go pośła jesce rōż. Pisza do Cia blank polekutku, bo jō ci gynał miarkuja, iże Ty niy poradzisz wartko czytać.

Niydōwno fater przeczytół we jakimsik cajtōngu, iże nōjwiyncyj niyszczysnych cufali przitrefiō sie ło jakisik kilomyjter łod włōśnyj chałpy, tōż tyż gibko wrōż przekludziylichmy sie ździebko dalszij. Miyszkōmy terōżki wszyjske we na isto szykownistyj chałpie. Je ci tu waszmaszina, chocia niy jeżech istō, eźli sie łōna niy popsowała. Wczoraj wcieplach rajn pranie, pociōngłach za sznōrek i pranie ci kajsik sie zapodziōło. Nale, przecamć sie skuli tego niy łobiysza...

Pogoda, launa niy ma u nōs nōjgorszyjszō. We łōńskim tydniu siōmpiōło ino ze dwa razy. Za piyrszōm razōm bez trzi dni, a za drugōm – bez śtyry dni. Co do jakli kerōm żeś kciół. Ujek Pyjakter pedziół, iże kej jō ci jōm pośła ze kneflami, to bydzie mocka kosztować, bo knefle sōm diosecko ciynżke. Beztōż tyż łoberwałach te knefle i wrajziōłach ci je do kabzy.

Fater dostół yntlich robota. Je ci skuli tego hyrny jak pōw, bo mō pod sia jakesik piyńcset ludzi... wysiywō trōłwa na kiyrchowie. Twoja szwestra, Julka, kerō sie już wydała na łostatku śległa, urodziōła. Niy miarkujymy jesce eźli to synek abo dziolszka, tōż tyż Ci niy rzykna eźliś je ujkym abo tantōm. Jak to bydzie dziolszka, to ta Twoja szwestra do łōnyj miano pō mie, nale bydzie to fest dziwoczne, coby gōdać na swoja cera – mama. Gorzij je ze Twojim bracikym, Hanyskym. Zawar ci łōn auto i łostawiōł klucyki driny. Musiōł pōjńść do dōm po drugi kōmplyt, coby nōs wyciōngnōńć ze pojstrzodka autoka.

Kej sie bydziesz widziół, kej sie spichniesz ze Gryjtōm, pozdrōw jōm łodymie, a eźli byś sie śniōm niy trefiōł, to łōnyj nic niy gōdej.

Twoja mamulka Zofija

P.S. Kciałach ci do tego brifu wciepnōńć pōra złociokōw, alech już na zicher zaklyjbowała kuwerta.

szkryfka – linijka tekstu; szkryfka – kreska, linia, prążek,